

22

佛
說
梵
網
經

上海圖書館藏書

上海图书馆藏书



A541 212 0010 1844B

梵網經序

後秦長安釋僧肇述

夫梵網經者。蓋是萬法之玄宗。衆經之要旨。大聖開物之真樸。行者階道之正路。是以如來權教。雖復無量。所言要趣。莫不以此爲指南之說。是以秦主識達園中。神凝紛表。雖威綸四海。而沾想虛玄。雖風偃八荒。而靜慮塵外。故弘始二年。淳風東扇。於是詔天竺法師鳩摩羅什。在長安草堂寺。及義學沙門三千餘僧。手執梵文。口翻解釋。五十餘部。唯梵網經一百二十卷六十一品。其中菩薩心地品第十。專明菩薩行地。是時道融道影。三百人等。卽受菩薩戒。人各誦此品。以爲心首。師徒義合。敬寫一品八十一部。流通於世。欲使仰希菩提者。追蹤以悟理。故冀於後代同聞焉。

佛說梵網經卷上

菩薩心地品之上

姚秦三藏法師鳩摩羅什譯

爾時釋迦牟尼佛在第四禪地中摩醯首羅天王宮與無量大梵天王不可說不可說菩薩眾說蓮華臺藏世界盧舍那佛所說心地法門品是時釋迦身放慧光所照從此天王宮乃至蓮華臺藏世界其中一切世界一切眾生各各相視歡喜快樂而未能知此光光何因何緣皆生疑念無量天人亦生疑念爾時眾中玄通華光主菩薩從大莊嚴華光明三昧起以佛神力放金剛白雲色光照一切世界是中一切菩薩皆來集會與共同心異口問此光光爲何等相是時釋迦卽擊接此世界大眾還至蓮華臺藏世界百萬億紫金剛光明宮中見盧舍那佛坐百萬億蓮華赫赫光

明座上時釋迦及諸大眾一時禮敬盧舍那佛足下已。釋迦佛言。此世界中地及虛空一切眾生。爲何因緣得成菩薩十地道。當成佛果。爲何等相。如佛性本源品中。廣問一切菩薩種子。爾時盧舍那佛卽大歡喜。現虛空光體性本源成佛常住法身三昧。示諸大眾。是諸佛子諦聽。善思修行。我已百阿僧祇劫修行心地。以之爲因。初捨凡夫成等正覺。號爲盧舍那住蓮華臺藏世界海。其臺周徧有千葉。一葉一世界。爲千世界。我化爲千釋迦。據千世界。後就一葉世界。復有百億須彌山。百億日月。百億四天下。百億南閻浮提。百億菩薩釋迦。坐百億菩提樹下。各說汝所問菩提薩埵心地。其餘九百九十九釋迦。各各現千百億釋迦。亦復如是。千葉上佛。是吾化身。千百億釋迦。是千釋迦化身。吾以爲本源。名爲盧舍那佛。爾時蓮華臺藏世界盧舍那佛。廣答告千釋迦。千百億釋迦所問心地法品。諸佛當

知堅信忍中十發趣心向果。一捨心。二戒心。三忍心。四進心。五定心。六慧心。七願心。八護心。九喜心。十頂心。諸佛當知。從是十發趣入堅法忍中。十長養心向果。一慈心。二悲心。三喜心。四捨心。五施心。六好語心。七益心。八同心。九定心。十慧心。諸佛當知。從是十長養心入堅修忍中。十金剛心向果。一信心。二念心。三回向心。四達心。五直心。六不退心。七大乘心。八無相心。九慧心。十不壞心。諸佛當知。從是十金剛心入堅聖忍中。十地向果。一體性平等地。二體性善慧地。三體性光明地。四體性爾燄地。五體性慧照地。六體性華光地。七體性滿足地。八體性佛吼地。九體性華嚴地。十體性入佛界地。是四十法門品。我先爲菩薩時修入佛果之根源。如是一切眾生入發趣長養金剛十地。證當成果。無爲無相。大滿常住。十力。十八不共行。法身智身滿足。爾時蓮華臺藏世界盧舍那佛赫赫大光明座上千華。

上佛千百億佛。一切世界佛。是座中有一菩薩。名華光王大智明菩薩。從坐而立。白盧舍那佛言。世尊。佛上略開十發趣。十長養。十金剛。十地名。相。其一義中。未可解了。唯願說之。唯願說之。妙極金剛寶藏。一切智門。如來百觀品中已明。

爾時盧舍那佛言。千佛諦聽。汝先言云何義者。發趣中。

第一捨心

此等皆是後人科文不宜雜入經文讀誦下卷第一殺戒等同

若佛子。一切捨。國土城邑田宅金銀明珠男女已身。有爲諸物。一切捨。無爲無相。我人知見。假會合成。主者造作我見。十二因緣。無合無散。無受者。十二入。十八界。五陰。一切一合相。無我我所相。假成諸法。若內一切法。外一切法。不捨不受。菩薩爾時名如假會觀現前。故捨心入空三昧。

第二戒心

若佛子。戒。非非戒。無受者。十善戒。無師說法。欺盜乃至邪見。無集者。慈良。清直正實。正見捨喜等。是十戒體性。制止八倒。一切性離。一道清淨。

第三忍心

若佛子。忍。有無相。慧體性。一切空。空忍。一切處。忍。名無生行。忍。一切處。得。名如苦忍。無量行。一。名忍。無受。無打。無刀杖。瞋心皆如如。無。一。諦。一。相。無無相。有無有相。非非心相。緣無緣相。立住動止。我人縛解。一切法如。忍相不可得。

第四進心

若佛子。若四威儀。一切時行。伏空。假會。法性。登無生山。而見一切有無如。有如無。天地青黃赤白。一切入。乃至三寶智性。一切信。進道空無生無作。無慧起空入世諦。法亦無二。相續空心。通達進分善根。

第五定心

若佛子。寂滅無相。無相。無量行。無量心。三昧。凡夫聖人。無不入三昧體性相應。一切以定力故。我人作者受者一切縛見性。是障因緣。散風動心。不寂而滅。空空八倒。無緣假靜慧觀一切假會。念念寂滅。一切三界果罪性。皆由定滅而生一切善。

第六慧心

若佛子。空慧非無緣。知體名心。分別一切法假名主者。與道通同。取果行。因入聖捨凡。滅罪起福。縛解盡。是體性功用。一切見常樂我淨煩惱。慧性不明。故以慧爲首。修不可說觀慧入中道一諦。其無明障慧非相。非來。非緣。非罪。非八倒。無生滅。慧光明燄爲照樂虛方便。轉變神通。以智體性所爲。慧用故。

第七願心

若佛子。願願。大求。一切求。以果行因。故願心連。願心連相續百劫。得佛滅罪。求求至心。無生空一。願觀觀入定照。無量見縛。以求心故解脫。無量妙行。以求心成菩提。無量功德。以求爲本。初發求心。中間修道。行滿願故。佛果便成。觀一諦中道。非陰。非界。非沒生見見。非解慧。是願體性。一切行本源。

第八護心

若佛子。護三寶。護一切行功德。使外道入倒惡邪見。不燒正信。滅我縛見縛。無生照達二諦。觀心現前。以護根本無相護。護空無作無相。以心慧連。慧連入無生空道。智道皆明光。明光護觀入空假分分幻化。幻化所起如無如無法體。集散不可護。觀法亦爾。

第九喜心

若佛子。見他人得樂常生喜悅。及一切物。假空照寂。而不入有爲。不無寂然大樂。無合有受。而化有法。而見云假。法性平等一觀。心心行多聞。一切佛行功德。無相喜智。心心生念。而靜照樂心。緣一切法。

第十頂心

若佛子。是人最上智。滅無我輪。見疑身一切瞋等。如頂觀連。觀連如頂。法界中因果。如如一道。最勝上如頂。如人頂。非非身見。六十二見。五陰生滅。神我主人動轉屈伸。無受。無行。可捉縛者。是人爾時入內空。值道。心心衆生。不見緣。不見非緣。住頂三昧。寂滅定。發行趣道。性實。我人常見。八倒生緣。不二法門。不受八難。幻化果畢。竟不受。唯一衆生去來坐立。修行滅罪。除十惡。生十善。入道正人。正智。正行。菩薩達觀現前。不受六道果。必不退。

佛種性中。生生入佛家。不離正信。上十天光品廣說。
盧舍那佛言。千佛諦聽。汝先問長養十心者。

第一慈心

若佛子。常生慈心。生樂因已。於無我智中。樂相應觀入法。受想行識色等
大法中。無生無住無滅。如幻如化。如如無二故。一切修行成法輪。化被一
切。能生正信。不由魔教。亦能使一切衆生得慈樂果。非實。非善惡果。解空
體性三昧。

第二悲心

若佛子。以悲空空無相悲緣行道。自滅一切苦。於一切衆生無量苦中生
智。不殺生緣。不殺法緣。不著我緣。故常行不殺不盜不婬。而一切衆生不
惱發菩提心者。於空見一切法如實相。種性行中生道智心。於六親六怨。

親怨三品中。與上樂智。上怨緣中。九品得樂果。空現時。自身他一切衆生。平等一樂。起大悲。

第三喜心

若佛子。悅喜。無生心時。種性體相。道智空。空喜。心不著我所。出沒三世。因果無集。一切有入。空觀行成。等喜。一切衆生起空入道。捨惡知識。求善知識。示我好道。使諸衆生入佛法家。法中常起歡喜。入佛位中。復是諸衆生入正信。捨邪見。背六道苦。故喜。

第四捨心

若佛子。常生捨心。無造無相。空法中。如虛空。於善惡有見無見。罪福二中。平等一照。非人非我所心。而自他體性不可得。爲大捨。及自身肉手足男女國城。如幻化。水流燈燄。一切捨。而無生心。常修其捨。

第五施心

若佛子。能以施心。被一切衆生。身施。口施。意施。財施。法施。教導一切衆生。內身外身。國城男女田宅。皆如如相。乃至無念財物。受者施者。亦內亦外。無合無散。無心行化。達理達施。一切相現在行。

第六好語心

若佛子。入體性愛語三昧。第一義諦法語義。一切實語言。皆順一語。調和一切衆生。心無嗔無諍。一切法空智無緣。常生愛心。行順佛意。亦順一切他人。以聖法語。教諸衆生。常行如心。發起善根。

第七益心

若佛子。利益心時。以實智體性。廣行智道。集一切明燄法門。集觀行七財。前人得利益。故受身命。而入利益三昧。現一切身。一切口。一切意。而震動。

大世界一切所爲所作。他人入法種空種道種中。得益得樂。現形六道無量苦惱之事。不以爲患。但益人爲利。

第八同心

若佛子。以道性智同空。無生法中。以無我智同生無二。空同源境。諸法如相。常生常住常滅。世法相續流轉無量。而能現無量形身色心等業。入諸六道。一切事同。空同無生。我同無物。而分身散形。故入同法三昧。

第九定心

若佛子。復從定心觀慧證空。心心靜緣。於我所法識界色界中而不動轉。逆順出沒故。常入百三昧。十禪支。以一念智作是見。一切我人若內若外。衆生種子。皆無合散。集成起作。而不可得。

第十慧心

若佛子。作慧見心。觀諸邪見結患等縛。無決定體性。順忍空同故。非陰。非界。非入。非衆生。非一我。非因果。非三世法。慧性起光。光一燄明明。見虛無受。其慧方便。生長養心。是心入起空空道。發無生心。上千海眼王品。已說心百法明門。

盧舍那佛言。千佛諦聽。汝先言金剛種子有十心。

第一信心

若佛子。信者。一切行以信爲首。衆德根本。不起外道邪見心。諸見名著。結有造業。必不受。入空無爲法中。三相無。無無。生無生。無住住。無滅滅。無有。一切法空。世諦第一義諦智。盡滅異空。色空。細心。心空。細心。心心空。故。信。信寂滅。無體性和合。亦無依然主者。我人名。用三界假我。我無得集相。故名無相信。

第二念心

若佛子。作念六念。常覺乃至常施。第一義諦。空。無著。無解。生住滅相不動。不到去來。而於諸業受者。一合相。回向入法界智。慧慧相乘。乘乘寂滅。燄燄無常。光光無無。生生不起。轉易空道。變前轉後。變轉化化。化轉轉變。同時同住。燄燄一相。生滅一時。已變未變。變化亦得一受。亦如是。

第三回向心

若佛子。深心者。第一義空。於實法空。智照有實諦。業道相續。因緣中道。名爲實諦。假名諸法。我人主者。名爲世諦。於此二有諦。深深入空。而無去來。幻化受果。而無受。故深深心解脫。

第四達心

若佛子。達照者。忍順一切實性。性性無縛。無解。無礙。法達。義達。辭達。教化。

達三世因果。衆生根行。如不合不散。無實用無用。無名用用。一切空空。照達空名爲通達。一切法空空。空空如如。相不可得。

第五直心

若佛子。直者直照。取緣神我入無生智。無明神我空空。空中空。空理心。在有在無而不壞道種子。無漏中道一觀。而教化一切十方衆生。轉一切衆生皆薩婆若。空直直性直行。於空三界生者結縛而不受。

第六不退心

若佛子。不退心者。不入一切凡夫地。不起新長養諸見。亦復不起集因。相似我人入三界業。亦行空而不住退。解脫於第一中道一合行。故不行退。本際無二故。而不念退。空生觀智如如。相續乘乘。心入不二。常空生心。一道一淨。爲不退一道一照。

第七大乘心

若佛子。獨大乘心者。解解一空故。一切行心名一乘。乘一空智。智乘。行乘。乘智心。心任載任用。任載任一切衆生度。三界河結縛。河生滅。河行者坐乘。任用載用智乘。趣入佛海。故一切衆生未得空智任用。不名爲大乘。但名乘得度苦海。

第八無相心

若佛子。無相心者。妄想解脫。照般若波羅蜜無二。一切結業三世法。如如一諦。而行於無生空。自知得成佛。一切佛是我等師。一切賢聖是我同學。皆同無生空故。名無相心。

第九慧心

若佛子。如如慧者。無量法界。無集無受生。生生煩惱而不縛。一切法門。一

切賢所行道。一切聖所觀法。所有亦如是一切佛教化方便法。我皆集在
心中。外道一切論邪定功用。幻化魔說。佛說皆分別入二諦處。非一非二。
非有陰界入。是慧光明。光明照性入一切法。

第十不壞心

若佛子。不壞心者。入聖地智。近解脫位。得道正門。明菩提心。伏忍順空。八
魔不壞。衆聖摩頂。諸佛勸發。入摩頂三昧。放身光。光照十方國土。入佛威
神。出沒自在。動大千界。與平等地心無二無別。而非中觀知道。以三昧力
故。光中見佛無量國土。現爲說法。爾時卽得頂三昧。證虛空平等地。總持
法門。聖行滿足。心心行空。空空慧中道無相照。故一切相滅。得金剛三昧
法門。入一切行門。入虛空平等地。如佛華經中廣說。

盧舍那佛言。千佛諦聽。汝先問地者有何義。

第一體性平等地

若佛子。菩提薩埵入平等慧體性地。真實法化。一切行華光滿足。四天果。乘用任化無方。理化神通。十力。十號。十八不共法。住佛淨土。無量大願。辯才無畏。一切論。一切行。我皆得入。生出佛家。坐佛性地。一切障礙。凡夫因果。畢竟不受。大樂歡喜。從一佛土入無量佛土。從一劫入無量劫。不可說法爲可說法。反照見一切法。逆順見一切法。常入二諦。而在第一義中。以一智知十地。次第一。一事示衆生。而常心心中道。以一智知一切佛土。殊品及佛所說法。而身心不變。以一智知十二因緣。十惡種性。而常住善道。以一切智見有無二相。以一智知入十禪支行。三十七道。而現一切色身。六道。以一智知十方色。色分分了起入受色報。而心心無縛。光光照一切。是故無生。信忍空慧常現在前。從一地。二地。乃至佛界。其中間一切法門。

一時而行。故略出平等地功德海藏行願。如海一滯毛頭許事。

第二體性善慧地

若佛子。菩提薩埵善慧體性地。清淨明達一切善根。所謂慈悲喜捨慧一切功德本。從觀入大空慧方便道智中。見諸衆生無非苦諦。皆有識心。三惡道刀杖一切苦惱緣中生識。名爲苦諦。三苦相者。如者。如身初覺。從刀杖身色陰二緣中生覺。爲行苦緣。次意地覺。緣身覺所緣。得刀杖及身瘡腫等法。故覺苦苦緣。重故苦苦。次受行覺二心。緣向身色陰壞瘡中生苦覺。故名爲壞苦緣。是以三覺次第生三心。故爲苦苦。一切有心衆生。見是三苦起無量苦惱因緣。故我於是中入教化道三昧。現一切色身於六道中。十種辯才。說諸法門。謂苦識苦緣。刀杖緣具。苦識行身。瘡腫發壞。內外觸中。或具不具。具二緣中生識。識作識受。觸識名爲苦識。行二緣故心

心緣色。心觸觸惱。受煩毒時爲苦苦。心緣識初在根覺緣。名爲苦覺。心作心受。觸識覺觸。未受煩毒時。是名行苦。逼迫生覺。如斲石火。於身心念念生滅。身散壞轉變化。識入壞緣。緣集散。心苦心惱。受念後緣染著。心心不捨。是爲壞苦。三界一切苦諦。復觀無明集。無量心作一切業。相續相連。集因。集因名爲集諦。正見解脫空空。智道心心。名以智道道諦。盡有果報。盡有因。清淨一照體性妙智寂滅一諦。慧品具足名根。一切慧性起空入觀。是初善根。第二觀捨一切貪著。行一切平等空捨。無緣而觀。諸法空際。一相。我觀一切十方地土。皆吾昔身所用故土。四大海水。是吾故水。一切劫火。是吾昔身故所用火。一切風輪。是吾故所用氣。我今入此地中。法身滿足。捨吾故身。畢竟不受四大分段不淨故身。是爲捨品具足。第三次觀於一切所化衆生。與人天樂。十地樂。離十惡畏樂。得妙華三昧樂。乃至佛樂。

如是觀者。慈品具足。菩薩爾時住是地中。無癡。無貪。無瞋。入平等一諦智。一切行本。遊佛一切世界。現化無量法身。如一切衆生天華品說。

第三體性光明地

若佛子。菩提薩埵光明體性地。以三昧解了智。知三世一切佛法門。十二法品名味句。重頌記別直語偈。不請說律戒譬喻佛界昔事。方正未曾有。談說。是法體性名。一切義別。是名味句中。說一切有爲法分分受生。初入識胎。四大增長。色心名六住。於根中起實覺。未別苦樂。名觸識。又覺苦樂。識名三受。連連覺著受無窮。以欲我見戒取善惡有。識初名生。識終名死。是十品現在苦因緣果。觀是行相中道。我久已離。故無自體性。入光明神通總持辯才。心心行空。而十方佛土中。現劫化轉化。百劫千劫國土中。養神通禮敬佛前。諮受法言。復現六道身。一音中說無量法品。而衆生各自

分分得聞心所欲之法。苦空無常無我。一諦之音。國土不同。身心別化。是妙華光明地中。略開一毛頭許。如法品解觀法門千三昧品說。

第四體性爾燄地

若佛子。菩提薩埵體性地中。爾真燄俗。不斷不常。卽生卽住卽滅。一世一時一有。種異異現異故。因緣中道。非一非二。非善非惡。非凡非佛。故佛界凡界。一一是名爲世諦。其智道觀無一無二。玄道定品。所謂說佛心行初覺定。因信覺。思覺。靜覺。上覺。念覺。慧覺。觀覺。猗覺。樂覺。捨覺。是品品方便道。心心入定果。是人住定中。燄燄見法行空。若起念。定入生心。定生愛順道。法化生。名法樂忍。住忍。證忍。寂滅忍。故諸佛於入光光華三昧中。現無量佛。以手摩頂。一音說法。百千起發。而不出定。住定。味樂定。著定。貪定。一劫千劫中住定。見佛蓮華坐說百法門。是人供養聽法。一劫住定。時諸佛

光中摩頂。發起定品。出相進相。去向相故。不沒不退。不墮不住。頂三昧法。上樂忍。永盡無餘。卽入一切佛土中。修行無量功德品。行行皆光明。入善權方便。教化一切衆生。能使得見佛體性常樂我淨。是人生住是地中行。化法門。漸漸深妙。空華觀智。入體性中道。一切法門品。滿足猶如金剛上。日月道品。已明斯義。

第五體性慧照地

若佛子。菩提薩埵。慧照體性地法。有十種力生品。起一切功德行。以一慧方便。知善惡二業別行。處力品。善作惡作。業智力品。一切欲求。願六道生。生果。欲力品。六道性分別不同。性力品。一切善惡根。一一不同。根力品。邪定。正定不定。是名定力品。一切因果。乘是因。乘是果。至果處。乘因道。是道。力品。五眼知一切法。見一切受生故。天眼力品。百劫事。一一知。宿世力品。

於一切生煩惱滅。一切受無明滅。解脫力品。是十力品。智知自修因果。亦知一切衆生因果分別。而身心口別用。以淨國土爲惡國土。以惡國土爲妙樂土。能轉善作惡。轉惡作善。色爲非色。非色爲色。以男爲女。以女爲男。以六道爲非六道。非六道爲六道。乃至地水火風非地水火風。是人爾時以大方便力。從一切衆生而見不可思議。下地所不能知覺。舉足下足事。是人大明智漸漸進。分分智光。光無量無量。不可說不可說。法門現在前行。

第六體性華光地

若佛子。菩提薩埵體性華光地。能於一切世界中。十神通明智品。以示一切衆生種種變化。以天眼明智。知三世國土中微塵等一切色。分分成六道衆生身。一一身微塵細色成大色。分分知。以天耳智。知十方三世六道。

衆生苦樂音聲。非非音。非非聲。一切法聲。以天身智。知一切色。色非色。非男非女形。於一念中。徧十方三世國土。劫量大小國土中微塵身。以天他心智。知三世衆生心中所行。十方六道中一切衆生心心所念苦樂善惡等事。以天人智。知十方三世國土中一切衆生宿世苦樂受命。一一知命。續百劫。以天解脫智。知十方三世衆生解脫斷除一切煩惱。若多若少。從一地乃至十地滅滅皆盡。以天定心智。知十方三世國土中衆生心。定不定。非定非不定。起定方法。有所攝受三昧百三昧。以天覺智。知一切衆生已成佛。未成佛。乃至一切六道人心心。亦知十方佛心中所說法。以天念智。知百劫千劫大小劫中。一切衆生受命命久近。以天願智。知一切衆生賢聖十地三十心中。一一行願。若求苦樂。若法非法。一切求。十願百千大願。品具足。是人住地中。十神通明中。現無量身心口別用。說地功德百千。

萬劫不可窮盡。而爾所釋迦。略開神通明品。如觀十二因緣品中說。

第七體性滿足地

若佛子。菩提薩埵。滿足體性地。入是法中。十八聖人智品。下地所不共。所謂身無漏過。口無語罪。念無失念。離八法。一切法中捨。常在三昧。是入地六品具足。復從是智生六足智。三界結習畢竟不受故。欲具足一切功德。一切法門所求滿故。進心足。一切法事。一切劫事。一切衆生事。以一中。一時知故。念心足。是二諦相。六道衆生一切法故。智慧足。知十發趣人。乃至一切佛無結無習故。解脫足。見一切衆生。知他人自我弟子無漏無諸煩惱習故。以智知他身六通足。是人入六滿足明智中。便起智身。隨六道衆生心行。口辯說無量法門品。示一切衆生故。隨一切衆生心行。常入三昧。而十方大地動。虛空化華。故能令衆生心行。以大明具足。見過去一切

劫中佛出世。亦是示一切衆生心。以無著智。見現在十方一切國土中。一切佛一切衆生心。心所行。以神通道智。見未來中一切劫一切佛出世。一切衆生。從是佛受道聽法。故住是十八聖人中心。心三昧。觀三界微塵等色。是我故身。一切衆生。是我父母。而今入是地中。一切功德。一切神光。一切佛所行法。乃至八地九地中一切法門品。我皆已入。故於一切佛國土中。示現作佛。成道轉法輪。示入滅度。轉化他方。過去來今一切國土中。

第八體性佛吼地

若佛子。菩提薩埵佛吼體性地。入法王位三昧。其智如佛。佛吼三昧。故十品大明空門。常現在前。華光音入心三昧。其空慧者。謂內空慧門。外空慧門。有爲空慧門。無爲空慧門。性空慧門。無始空慧門。第一義空慧門。空空慧門。空空復空慧門。空空復空空慧門。如是十空門。下地各所不知。虛空

平等地不可說不可說神通道智。以一念智知一切法分分別異。而入無量佛國土中。一一佛前諮受法。轉法度與一切衆生。而以法藥施一切衆生。爲大法師。爲大導師。破壞四魔法身具足。化化入佛界。是諸佛數。是諸九地十地數中長養法身。百千陀羅尼門。百千三昧門。百千金剛門。百千神通門。百千解脫門。如是百千虛空平等門中而大自在。一念一時行。劫說非劫。非劫說劫。非道說道。道說非道。非六道衆生說六道衆生。六道衆生說非六道衆生。非佛說佛。佛說非佛。而入出諸佛體性三昧中。反照順照。逆照前照。後照。因照。果照。空照。有照。第一中道義諦照。是智惟八地所證。下地所不及。不動不到。不出不入。不生不滅。是地法門品。無量無量不可說不可說。今以略開地中百千分一毛頭許事。羅漢品中已明。

第九體性華嚴地

若佛子。菩提薩埵佛華嚴體性地。以佛威儀。如來三昧自在。王王定。出入無時。於十方三千世界。百億日月。百億四天下。一時成佛。轉法輪。乃至滅度。一切佛事。以一心中一時示現一切衆生。一切色身八十種好。三十二相。自在樂。虛空同。無量大悲光明相好莊嚴。非天人。非六道。一切法外。而常行六道。現無量身。無量口。無量意。說無量法門。而能轉魔界入佛界。佛界入魔界。復轉一切見入佛見。佛見入一切見。佛性入衆生性。衆生性入佛性。其地光光照。慧慧照。明燄明燄。無畏。無量十力十八不共法。解脫涅槃。無爲一道清淨。而以一切衆生作父母兄弟。爲其說法。盡一切劫。得道果。又現一切國土。爲一切衆生相視如父如母。天魔外道相視如父如母。住是地中。從生死際起。至金剛際。以一念心中現如是事。而能轉入無量衆生界。如是無量略說如海一滴。

第十體性入佛界地

若佛子。菩提薩埵入佛界體性地。其大慧空空復空空復空。如虛空性平等智。有如來性十功德品具足。空同一相。體性無爲。神虛體一。法同法性。故名如來。應順四諦二諦。盡生死輪際。法養法身無二。是名應供。徧覆一切世界中一切事。正智聖解脫智。知一切法有無一切衆生根故。是正徧知。明明修行。佛果時足故。是明行足。善逝三世佛法。法同先佛法。佛去時善善來時善善。是名善善。是人行是上德。入世間中教化衆生。使衆生解脫一切結縛故。名世間解脫。是人一切法上。入佛威神。儀形如佛。大士行處。爲世間解脫。調順一切衆生。名爲丈夫。於天人中教化。一切衆生。諮受法言故。是天人師。妙本無二。佛性立覺常常大滿。一切衆生禮拜故。尊敬故。是佛世尊。一切世人諮受奉教。故是佛地。是地中一切聖人之所入處。

故名佛界地。爾時坐寶蓮華上。一切與授記歡喜。法身手摩其頂。同見同學菩薩。異口同音讚歎無二。又有百千億世界中一切佛。一切菩薩。一時雲集。請轉不可說法輪。虛空藏化導法門。是地有不可說奇妙法門品。奇妙三明三昧門。陀羅尼門。非下地凡夫心識所知。惟佛佛無量身口心意可盡其源。如光音天品中說。十無畏與佛道同。

爾時盧舍那佛爲此大衆略開百千恆河沙不可說法門中心地。如毛頭許。是過去一切佛已說。未來佛當說。現在佛今說。三世菩薩已學。當學。今學。我已百劫修行是心地。號吾爲盧舍那。汝諸佛轉我所說。與一切衆生開心地道。爾時蓮華臺藏世界赫赫天光師子座上盧舍那佛放光。光告千華上佛。持我心地法門品而去。復轉爲千百億釋迦及一切衆生。次第說我上心地法門品。汝等受持讀誦。一心而行。爾時千華上佛。千百億釋

迦。從蓮華臺藏世界赫赫師子座起。各各辭退舉身放不可思議光。光皆化無量佛。一時以無量青黃赤白華。供養盧舍那佛。受持上說心地法門品竟。各各從此蓮華臺藏世界而沒。沒已。入體性虛空華光三昧。還本世界閻浮提菩提樹下。從體性虛空華光三昧出。出已。方坐金剛千光王座。及妙光堂。說十世界海。復從座起。至帝釋宮。說十住。復從座起。至燄天中說十行。復從座起。至第四天說十回向。復從座起。至化樂天說十禪定。復從座起。至他化天說十地。復至一禪中說十金剛。復至二禪中說十忍。復至三禪中說十願。復至四禪中摩醯首羅天王宮。說我本源蓮華臺藏世界盧舍那佛所說心地法門品。其餘千百億釋迦。亦復如是。無二無別。如賢劫品中說。

佛說梵網經卷上

校譌

第三十頁七行

是名善善善似當

第九行

為世間解脫合註

第三十二頁

四行

千光王座合註
云千當作華

佛說梵網經卷下

姚秦三藏法師鳩摩羅什譯

菩薩心地品之下

爾時釋迦牟尼佛從初現蓮華臺藏世界東方來入天王宮中說魔受化經已。下生南閻浮提迦夷羅國。母名摩耶。父字白淨。吾名悉達。七歲出家。三十成道。號吾爲釋迦牟尼佛。於寂滅道場坐金剛華光王座。乃至摩醯首羅天王宮。其中次第第十住處所說。時佛觀諸大梵天王網羅幢。因爲說無量世界。猶如網孔。一一世界。各各不同。別異無量。佛教門亦復如是。吾今來此世界八千返。爲此娑婆世界。坐金剛華光王座。乃至摩醯首羅天王宮。爲是中一切大衆。略開心地法門。竟復從天王宮。下至閻浮提菩提樹下。爲此地上一切衆生。凡夫癡暗之人。說我本盧舍那佛心地中。初發

心中常所誦一戒。光明金剛寶戒。是一切佛本源。一切菩薩本源。佛性種子。一切衆生皆有佛性。一切意識色心是情是心。皆入佛性戒中。當當常有因故。當當常住法身。如是十波羅提木叉出於世界。是法戒。是三世一切衆生頂戴奉持。吾今當爲此大衆重說無盡藏戒品。是一切衆生戒本源。自性清淨。

我今盧舍那 方坐蓮華臺 周匝千華上 復現千釋迦

一華百億國 一國一釋迦 各坐菩提樹 一時成佛道

如是千百億 盧舍那本身 千百億釋迦 各接微塵衆

俱來至我所 聽我誦佛戒 甘露門卽開 是時千百億

還至本道場 各坐菩提樹 誦我本師戒 十重四十八

戒如明日月 亦如瓔珞珠 微塵菩薩衆 由是成正覺

是盧舍那誦 我亦如是誦 汝新學菩薩 頂戴受持戒
受持是戒已 轉授諸衆生 諦聽我正誦 佛法中戒藏
波羅提木叉 大衆心諦信 汝是當成佛 我是已成佛
常作如是信 戒品已具足 一切有心者 皆應攝佛戒
衆生受佛戒 卽入諸佛位 位同大覺已 眞是諸佛子
大衆皆恭敬 至心聽我誦

爾時釋迦牟尼佛。初坐菩提樹下。成無上正覺已。初結菩薩波羅提木叉。孝順父母師僧三寶。孝順至道之法。孝名爲戒。亦名制止。佛卽口放無量光明。是時百萬億大衆。諸菩薩。十八梵天。六欲天子。十六大國王。合掌至心聽佛誦一切諸佛大乘戒。佛告諸菩薩言。我今半月半月自誦諸佛法戒。汝等一切發心菩薩。乃至十發趣十長養十金剛十地諸菩薩亦誦。是

故戒光從口出。有緣非無因。故光非青黃赤白黑。非色非心。非有非無。非因果法。是諸佛之本源。行菩薩道之根本。是大衆諸佛子之根本。是故大衆諸佛子。應受持。應讀誦。應善學。佛子諦聽。若受佛戒者。國王。王子。百官。宰相。比丘。比丘尼。十八梵天。六欲天子。庶民。黃門。婬男。婬女。奴婢。八部鬼神。金剛神。畜生。乃至變化人。但解法師語。盡受得戒。皆名第一清淨者。佛告諸佛子。言。有十重波羅提木叉。若受菩薩戒。不誦此戒者。非菩薩。非佛種子。我亦如是誦。一切菩薩已學。一切菩薩當學。一切菩薩今學。已略說菩薩波羅提木叉相貌。應當學。敬心奉持。

第一殺戒

佛言。若佛子。若自殺。教人殺。方便殺。讚歎殺。見作隨喜。乃至呪殺。殺因。殺緣。殺法。殺業。乃至一切有命者。不得故殺。是菩薩應起常住慈悲心。孝順。

心方便救護一切衆生。而反自恣心快意殺生者。是菩薩波羅夷罪。

第二盜戒

若佛子。自盜。教人盜。方便盜。呪盜。盜因。盜緣。盜法。盜業。乃至鬼神有主劫賊物。一切財物。一針一草。不得故盜。而菩薩應生佛性。孝順心。慈悲心。常助一切人生福生樂。而反更盜人財物者。是菩薩波羅夷罪。

第三婬戒

若佛子。自婬。教人婬。乃至一切女人。不得故婬。婬因。婬緣。婬法。婬業。乃至畜生女。諸天鬼神女。及非道行婬。而菩薩應生孝順心。救度一切衆生。淨法與人。而反更起一切人婬。不擇畜生。乃至母女姊妹六親行婬。無慈悲心者。是菩薩波羅夷罪。

第四妄語戒

若佛子。自妄語。教人妄語。方便妄語。妄語因。妄語緣。妄語法。妄語業。乃至不見言見。見言不見。身心妄語。而菩薩常生正語正見。亦生一切衆生正語正見。而反更起一切衆生邪語邪見邪業者。是菩薩波羅夷罪。

等五酤酒戒

若佛子。自酤酒。教人酤酒。酤酒因。酤酒緣。酤酒法。酤酒業。一切酒不得酤。是酒起罪因緣。而菩薩應生一切衆生明達之慧。而反更生一切衆生顛倒之心者。是菩薩波羅夷罪。

第六說四衆過戒

若佛子。口自說出。家在家菩薩比丘比丘尼罪過。教人說罪過。罪過因。罪過緣。罪過法。罪過業。而菩薩聞外道惡人。及二乘惡人。說佛法中非法非律。常生慈心。教化是惡人輩。令生大乘善信。而菩薩反更自說佛法中罪

過者。是菩薩波羅夷罪。

第七自讚毀他戒

若佛子。自讚毀他。亦教人自讚毀他。毀他因。毀他緣。毀他法。毀他業。而菩薩應代一切衆生受加毀辱。惡事向自己。好事與他人。若自揚己德。隱他人好事。令他人受毀者。是菩薩波羅夷罪。

第八慳惜加毀戒

若佛子。自慳。教人慳。慳因。慳緣。慳法。慳業。而菩薩見一切貧窮人來乞者。隨前人所須。一切給與。而菩薩以惡心。瞋心。乃至不施一錢一針一草。有求法者。不爲說一句一偈。一微塵許法。而反更罵辱者。是菩薩波羅夷罪。

第九瞋心不受悔戒

若佛子。自瞋。教人瞋。瞋因。瞋緣。瞋法。瞋業。而菩薩應生一切衆生善根無

諍之事。常生慈悲心。孝順心。而反更於一切衆生中。乃至於非衆生中。以惡口罵辱。加以手打。及以刀杖。意猶不息。前人求悔。善言懺謝。猶瞋不解者。是菩薩波羅夷罪。

第十謗三寶戒

若佛子。自謗三寶。教人謗三寶。謗因。謗緣。謗法。謗業。而菩薩見外道及以惡人。一言謗佛音聲。如三百矛刺心。况口自謗。不生信心。孝順心。而反更助惡人。邪見人。謗者。是菩薩波羅夷罪。

善學諸仁者。是菩薩十波羅提木叉。應當學。於中不應一一犯。如微塵許。何況具足犯十戒。若有犯者。不得現身發菩提心。亦失國王位。轉輪王位。亦失比丘比丘尼位。亦失十發趣。十長養。十金剛。十地。佛性常住妙果。一切皆失。墮三惡道中。二劫三劫。不聞父母三寶名字。以是不應一一犯。汝

等一切菩薩。今學當學已學。如是十戒。應當學。敬心奉持。八萬威儀品當廣明。

佛告諸菩薩言。已說十波羅提木叉竟。四十八輕今當說。

第一不敬師友戒

若佛子。欲受國王位時。受轉輪王位時。百官受位時。應先受菩薩戒。一切鬼神救護王身百官之身。諸佛歡喜。既得戒已。生孝順心。恭敬心。見上座和尚。阿闍梨。大德同學同見同行者。應起承迎禮拜。問訊。而菩薩反生憍心。慢心。癡心。瞋心。不起承迎禮拜。一一不如法供養。以自賣身國城男女七寶百物而供給之。若不爾者。犯輕垢罪。

第二飲酒戒

若佛子。故飲酒。而酒生過失無量。若自身手過酒器與人飲酒者。五百世

無手。何況自飲。亦不得教一切人飲。及一切衆生飲酒。况自飲酒。一切酒不得飲。若故自飲。教人飲者。犯輕垢罪。

第三食肉戒

若佛子。故食肉。一切衆生肉不得食。夫食肉者。斷大慈悲佛性種子。一切衆生見而捨去。是故一切菩薩不得食一切衆生肉。食肉得無量罪。若故食者。犯輕垢罪。

第四食五辛戒

若佛子。不得食五辛。大蒜。茗葱。慈葱。蘭葱。興渠。是五辛。一切食中不得食。若故食者。犯輕垢罪。

第五不教悔罪戒

若佛子。見一切衆生犯八戒。五戒。十戒。毀禁。七逆。八難。一切犯戒罪。應教

懺悔而菩薩不教懺悔同住同僧利養而共布薩一衆說戒而不舉其罪不教悔過者犯輕垢罪。

第六不供給請法戒

若佛子見大乘法師大乘同學同見同行來入僧坊舍宅城邑若百里千里來者卽起迎來送去禮拜供養日日三時供養日食三兩金百味飲食牀座醫藥供事法師一切所須盡給與之常請法師三時說法日日三時禮拜不生瞋心患惱之心爲法滅身請法不懈若不爾者犯輕垢罪。

第七不往聽法戒

若佛子一切處有講法毗尼經律大宅舍中有講法處是新學菩薩應持經律卷至法師所聽受諮問若山林樹下僧地房中一切說法處悉至聽受若不至彼聽受諮問者犯輕垢罪。

第八心背大乘戒

若佛子。心背大乘常住經律。言非佛說。而受持二乘聲聞外道惡見一切禁戒邪見經律者。犯輕垢罪。

第九不看病戒

若佛子。見一切疾病人。常應供養。如佛無異。八福田中。看病福田。是第一福田。若父母師僧弟子病。諸根不具。百種病苦惱。皆供養令差。而菩薩以瞋恨心不看。乃至僧坊城邑曠野山林道路中。見病不救濟者。犯輕垢罪。

第十畜殺具戒

若佛子。不得畜一切刀杖弓箭矛斧鬪戰之具。及惡網羅冒殺生之器。一切不得畜。而菩薩乃至殺父母尚不加報。况殺一切衆生。不得畜殺衆生具。若故畜者。犯輕垢罪。

如是十戒。應當學。敬心奉持。下六度品中廣明。

第十一國使戒

若佛子。不得爲利養惡心故。通國使命。軍陣合會。興師相伐。殺無量衆生。而菩薩尙不得入軍中往來。况故作國賊。若故作者。犯輕垢罪。

第十二販賣戒

若佛子。故販賣良人奴婢六畜。市易棺材板木盛死之具。尙不應自作。况教人作。若故自作。教人作者。犯輕垢罪。

第十三謗毀戒

若佛子。以惡心故。無事謗他良人善人。法師師僧。國王貴人。言犯七逆十重。於父母兄弟六親中。應生孝順心。慈悲心。而反更加於逆害。墮不如意處者。犯輕垢罪。

第十四放火焚燒戒

若佛子。以惡心故。放大火燒山林曠野。四月乃至九月放火。若燒他人家屋宅城邑僧坊田木。及鬼神官物。一切有生物不得故燒。若故燒者。犯輕垢罪。

第十五僻教戒

若佛子。自佛弟子。及外道惡人。六親一切善知識。應一一教受持大乘經律。應教解義理。使發菩提心。十發趣心。十長養心。十金剛心。於三十心中。一一解其次第法用。而菩薩以惡心瞋心橫教。二乘聲聞經律。外道邪見論等。犯輕垢罪。

第十六爲利倒說戒

若佛子。應好心先學大乘威儀經律。廣開解義味。見後新學菩薩。有從百

里千里來求大乘經律。應如法爲說一切苦行。若燒身燒臂燒指。若不燒身臂指供養諸佛。非出家菩薩。乃至餓虎狼師子。一切餓鬼。悉應捨身肉手足而供養之。然後一一次第爲說正法。使心開意解。而菩薩爲利養故。應答不答。倒說經律文字。無前無後。謗三寶說者。犯輕垢罪。

第十七恃勢乞求戒

若佛子。自爲飲食錢財利養名譽故。親近國王王子大臣百官。恃作形勢。乞索打拍牽挽。橫取錢物。一切求利。名爲惡求。多求。教他人求。都無慈心。無孝順心者。犯輕垢罪。

第十八無解作師戒

若佛子。應學十二部經。誦戒者。日日六時持菩薩戒。解其義理。佛性之性。而菩薩不解一句一偈。及戒律因緣。詐言能解者。卽爲自欺誑。亦欺誑他。

人。一一不解一切法不知。而爲他人作師授戒者。犯輕垢罪。

第十九兩舌戒

若佛子。以惡心故。見持戒比丘。手捉香爐。行菩薩行。而鬪違兩頭。謗欺賢人。無惡不造者。犯輕垢罪。

第二十不行放救戒

若佛子。以慈心故。行放生業。一切男子是我父。一切女人是我母。我生生無不從之受生。故六道衆生。皆是我父母。而殺而食者。卽殺我父母。亦殺我故身。一切地水是我先身。一切火風是我本體。故常行放生。生生受生。常住之法。教人放生。若見世人殺畜生時。應方便救護。解其苦難。常教化講說菩薩戒。救度衆生。若父母兄弟死亡之日。應請法師講菩薩戒經律。福資亡者。得見諸佛。生人天上。若不爾者。犯輕垢罪。

如是十戒。應當學。敬心奉持。如滅罪品中廣明一一戒相。

第二十一 瞋打報讎戒

若佛子。不得以瞋報瞋。以打報打。若殺父母兄弟六親。不得加報。若國主爲他人殺者。亦不得加報。殺生報生。不順孝道。尙不畜奴婢。打拍罵辱。日起三業。口罪無量。况故作七逆之罪。而出家菩薩。無慈心報讎。乃至六親中故報者。犯輕垢罪。

第二十二 憍慢不請法戒

若佛子。初始出家。未有所解。而自恃聰明有智。或恃高貴年宿。或恃大姓高門。大解大福。大富饒財七寶。以此憍慢。而不諮受先學法師經律。其法師者。或小姓年少。卑門貧窮。下賤諸根不具。而實有德。一切經律盡解。而新學菩薩。不得觀法師種姓。而不來諮受法師第一義諦者。犯輕垢罪。

第二十三 憍慢僻說戒

若佛子。佛滅度後。欲以好心受菩薩戒時。於佛菩薩形像前自誓受戒。當以七日佛前懺悔。得見好相。便得戒。若不得好相。應二七三七。乃至一年。要得好相。得好相已。便得佛菩薩形像前受戒。若不得好相。雖佛像前受戒。不名得戒。若先受菩薩戒。法師前受戒時。不須要見好相。何以故。是法師師師相授。故不須好相。是以法師前受戒時。即得戒。以生至重心。故便得戒。若千里內無能授戒師。得佛菩薩形像前自誓受戒。而要見好相。若法師自倚解經律大乘學戒。與國王太子百官。以爲善友。而新學菩薩來問。若經義律義。輕心惡心慢心。不一一好答問者。犯輕垢罪。

第二十四 不習學佛戒

若佛子。有佛經律大乘法。正見正性正法身。而不能勤學修習。而捨七寶。

反學邪見二乘外道俗典阿毗曇雜論一切書記。是斷佛性障道因緣。非行菩薩道者。若故作者。犯輕垢罪。

第二十五不善知衆戒

若佛子。佛滅度後。爲說法主。爲行法主。爲僧坊主。教化主。坐禪主。行來主。應生慈心。善和鬪諍。善守三寶物。莫無度用。如自己。有而反亂衆鬪諍。恣心用三寶物者。犯輕垢罪。

第二十六獨受利養戒

若佛子。先在僧坊中住。後見客菩薩比丘來入僧坊舍宅城邑。若國王宅舍中。乃至夏坐安居處。及大會中。先住僧應迎來送去。飲食供養。房舍臥具繩牀木牀。事事給與。若無物。應賣自身及男女身。割自身肉。賣供給所須。悉以與之。若有檀越來請衆僧。客僧有利養分。僧坊主應次第差客僧。

受請而先住僧獨受請而不差客僧者。僧坊主得無量罪。畜生無異。非沙門。非釋種。姓犯輕垢罪。

第二十七受別請戒

若佛子。一切不得受別請利養入己。而此利養屬十方僧。而別受請。卽是取十方僧物入己。及八福田中。諸佛聖人。一師僧父母病人物自己用。故犯輕垢罪。

第二十八別請僧戒

若佛子。有出家菩薩。在家菩薩。及一切檀越。請僧福田求願之時。應入僧坊。問知事人。今欲請僧求願。知事報言。次第請者。卽得十方賢聖僧。而世人別請五百羅漢菩薩僧。不如僧次。一凡夫僧。若別請僧者。是外道法。七佛無別請法。不順孝道。若故別請僧者。犯輕垢罪。

第二十九邪命戒

若佛子。以惡心故。爲利養。販賣男女色。自手作食。自磨自舂。占相男女。解夢吉凶。是男是女。呪術工巧。調鷹方法。和合百種毒藥。千種毒藥。蛇毒。生金銀毒。蠱毒。都無慈愍心。無孝順心。若故作者。犯輕垢罪。

第三十經理白衣戒

若佛子。以惡心故。自身謗三寶。詐現親附。口便說空行。在有中。經理白衣。爲白衣通致男女。交會姪色。作諸縛著。於六齋日。年三長齋月。作殺生。劫盜。破齋。犯戒者。犯輕垢罪。

如是十戒。應當學。敬心奉持。制戒品中廣明。

第三十一不行救贖戒

佛言。佛滅度後。於惡世中。若見外道。一切惡人。劫賊。賣佛菩薩父母。

形像。及賣經律。販賣比丘比丘尼。亦賣發菩提心菩薩道人。或爲官使。與一切人作奴婢者。而菩薩見是事已。應生慈悲心。方便救護。處處教化。取物贖佛菩薩形像。及比丘比丘尼發心菩薩。一切經律。若不贖者。犯輕垢罪。

第三十二損害衆生戒

若佛子。不得販賣刀杖弓箭。畜輕秤小斗。因官形勢。取人財物。害心繫縛。破壞成功。長養貓狸豬狗。若故養者。犯輕垢罪。

第三十三邪業覺觀戒

若佛子。以惡心故。觀一切男女等鬪。軍陣兵將劫賊等鬪。亦不得聽吹貝鼓角。琴瑟。箏。笛。篳篥。歌叫妓樂之聲。不得樗蒲。圍碁。波羅塞戲。彈碁。六博。拍毬。擲石。投壺。牽道。八道行城。爪鏡。著草。楊枝。鉢盂。髑髏。而作卜筮。不得

作盜賊使命。一一不得作。若故作者。犯輕垢罪。

第三十四暫離菩提心戒

若佛子。護持禁戒。行住坐臥。日夜六時。讀誦是戒。猶如金剛。如帶持浮囊。欲度大海。如草繫比丘。常生大乘善信。自知我是未成之佛。諸佛是已成之佛。發菩提心。念念不去心。若起一念二乘外道心者。犯輕垢罪。

第三十五不發願戒

若佛子。常應發一切願。孝順父母師僧。願得好師。同學善知識。常教我大乘經律。十發趣。十長養。十金剛。十地。使我開解。如法修行。堅持佛戒。寧捨身命。念念不去心。若一切菩薩不發是願者。犯輕垢罪。

第三十六不發誓戒

若佛子。發是十大願已。持佛禁戒。作是誓言。寧以此身投熾然猛火。大坑

刀山終不毀犯三世諸佛經律。與一切女人作不淨行。復作是願。寧以熱鐵羅網。千重周帀纏身。終不以此破戒之身。受於信心。檀越一切衣服。復作是願。寧以此口吞熱鐵丸。及大流猛火。經百千劫。終不以此破戒之口。食於信心。檀越百味飲食。復作是願。寧以此身臥大流猛火。羅網熱鐵地上。終不以此破戒之身。受於信心。檀越百種牀座。復作是願。寧以此身受三百矛刺身。經一劫二劫。終不以此破戒之身。受於信心。檀越百味醫藥。復作是願。寧以此身投熱鐵鑊。經百千劫。終不以此破戒之身。受於信心。檀越千種房舍屋宅。園林田地。復作是願。寧以鐵錘打碎此身。從頭至足。令如微塵。終不以此破戒之身。受於信心。檀越恭敬禮拜。復作是願。寧以百千熱鐵刀矛。挑其兩目。終不以此破戒之心。視他好色。復作是願。寧以百千鐵錐。剗刺耳根。經一劫二劫。終不以此破戒之心。聽好音聲。復作是

願寧以百千刃刀。割去其鼻。終不以此破戒之心。貪嗅諸香。復作是願。寧以百千刃刀。割斷其舌。終不以此破戒之心。食人百味淨食。復作是願。寧以利斧。斬破其身。終不以此破戒之心。貪著好觸。復作是願。願一切衆生。悉得成佛。而菩薩若不發是願者。犯輕垢罪。

第三十七冒難遊行戒

若佛子。常應二時頭陀。冬夏坐禪。結夏安居。常用楊枝。澡豆。三衣。餅鉢。坐具。錫杖。香爐。奩。漉水囊。手巾。刀子。火燧。鑷子。繩牀。經律。佛像。菩薩形像。而菩薩行頭陀時。及遊方時。行來百里千里。此十八種物。常隨其身。頭陀者。從正月十五日至三月十五日。八月十五日。至十月十五日。是二時中。此十八種物。常隨其身。如鳥二翼。若布薩日。新學菩薩。半月半月常布薩。誦十重四十八輕戒。若誦戒時。當於諸佛菩薩形像前誦。一人布薩。卽一人

誦若二人三人至百千人亦一人誦誦者高座聽者下座各各披九條七條五條袈裟若結夏安居時亦應一如法若行頭陀時莫入難處若惡國界若惡國王土地高下草木深邃師子虎狼水火風難及以劫賊道路毒蛇一切難處悉不得入頭陀行道乃至夏坐安居是諸難處皆不得入若故入者犯輕垢罪。

第三十八乖尊卑次第戒

若佛子應如法次第坐先受戒者在前坐後受戒者在後坐不問老少比丘比丘尼貴人國王王子乃至黃門奴婢皆應先受戒者在前坐後受戒者次第而坐莫如外道癡人若老若少無前無後坐無次第如兵奴之法我佛法中先者先坐後者後坐而菩薩一不如法次第坐者犯輕垢罪。

第三十九不修福慧戒

若佛子。常應教化一切衆生。建立僧坊。山林園田。立作佛塔。冬夏安居。坐禪處所。一切行道處。皆應立之。而菩薩應爲一切衆生。講說大乘經律。若疾病。國難。賊難。父母兄弟。和尚阿闍梨。亡滅之日。及三七日。四五六日。乃至七七日。亦應講說大乘經律。一切齋會。求願行來。治生大火所燒。大水所漂。黑風所吹。船舫。江湖大海。羅刹之難。亦讀誦講說此經律。乃至一切罪報。三惡八難。七逆。杻械枷鎖。繫縛其身。多婬多瞋。多愚癡。多疾病。皆應講此經律。而新學菩薩。若不爾者。犯輕垢罪。如是九戒。應當學。敬心奉持。梵壇品當廣明。

第四十揀擇受戒戒

若佛子。與人受戒時。不得揀擇。一切國王。王子。大臣。百官。比丘。比丘尼。信男。信女。姪男。姪女。十八梵天。六欲天子。無根。二根。黃門。奴婢。一切鬼神。盡

得受戒。應教身所著袈裟。皆使壞色。與道相應。皆染使青黃赤黑紫色。一切染衣。乃至臥具。盡以壞色。身所著衣。一切染色。若一切國土中國人所著衣服。比丘皆應與其俗服有異。若欲受戒時。師應問言。汝現身不作七逆罪不。菩薩法師不得與七逆人現身受戒。七逆者。出佛身血。殺父。殺母。殺和尚。殺阿闍梨。破羯磨轉法輪僧。殺聖人。若具七逆。卽現身不得戒。餘一切人盡得受戒。出家人法。不向國王禮拜。不向父母禮拜。六親不敬。鬼神不禮。但解法師語。有百里千里來求法者。而菩薩法師以惡心瞋心。而不卽與授一切衆生戒者。犯輕垢罪。

第四十一爲利作師戒

若佛子。教化人起信心時。菩薩與他人作教誡法師者。見欲受戒人。應教請二師。和尚阿闍梨二師。應問言。汝有七遮罪不。若現身有七遮罪者。師

不應與受戒。若無七遮者。得與受戒。若有犯十戒者。應教懺悔。在佛菩薩形像前。日夜六時。誦十重四十八輕戒。苦到禮三世千佛。得見好相。若一七日。二三日。乃至一年。要見好相。好相者。佛來摩頂。見光見華。種種異相。便得滅罪。若無好相。雖懺無益。是人現身亦不得戒。而得增益受戒。若犯四十八輕戒者。對首懺悔。罪便得滅。不同七遮。而教誡師於是法中。一好解。若不解大乘經律。若輕若重。是非之相。不解第一義諦。習種性。長養性。性種性。不可壞性。道種性。正法性。其中多少。觀行出入。十禪支。一切行法。一一不得此法中意。而菩薩爲利養故。爲名聞故。惡求多求。貪利弟子。而詐現解一切經律。爲供養故。是自欺詐。亦欺詐他人。故與人授戒者。犯輕垢罪。

第四十二爲惡人說戒戒

若佛子。不得爲利養故。於未受菩薩戒者前。若外道惡人前。說此千佛大戒。邪見人前。亦不得說。除國王。餘一切不得說。是惡人輩。不受佛戒。名爲畜生。生生之處。不見三寶。如木石無心。名爲外道。邪見人輩。木頭無異。而菩薩於是惡人前。說七佛教戒者。犯輕垢罪。

第四十三故起犯戒心戒

若佛子。信心出家。受佛正戒。故起心毀犯聖戒者。不得受一切檀越供養。亦不得國王地上行。不得飲國王水。五千大鬼常遮其前。鬼言大賊。若入房舍城邑宅中。鬼復常掃其腳迹。一切世人皆罵言。佛法中賊。一切衆生。眼不欲見。犯戒之人。畜生無異。木頭無異。若故毀正戒者。犯輕垢罪。

第四十四不供養經典戒

若佛子。常應一心受持讀誦大乘經律。剝皮爲紙。刺血爲墨。以髓爲水。析

骨爲筆。書寫佛戒。木皮穀紙。絹素竹帛。亦悉書持。常以七寶。無價香華。一切雜寶。爲香囊。盛經律卷。若不如法供養者。犯輕垢罪。

第四十五不化衆生戒

若佛子。常起大悲心。若入一切城邑舍宅。見一切衆生。應當唱言。汝等衆生。盡應受三歸十戒。若見牛馬豬羊一切畜生。應心念口言。汝是畜生。發菩提心。而菩薩入一切處山林川野。皆使一切衆生發菩提心。是菩薩若不發教化衆生心者。犯輕垢罪。

第四十六說法不如法戒

若佛子。常應教化。起大悲心。若入檀越貴人家。一切衆中。不得立爲白衣說法。應在白衣衆前。高座上坐。法師比丘。不得地立爲四衆說法。若說法時。法師高座。香華供養。四衆聽者下坐。如孝順父母。敬順師教。如事火婆

羅門。其說法者。若不如法說。犯輕垢罪。

第四十七非法制限戒

若佛子。皆已信心受佛戒者。若國王太子。百官四部弟子。自恃高貴。破滅佛法戒律。明作制法。制我四部弟子。不聽出家行道。亦復不聽造立形像。佛塔經律。立統官制衆。使安籍記僧。菩薩比丘地立白衣高座。廣行非法。如兵奴事主。而菩薩正應受一切人供養。而反爲官走使。非法非律。若國王百官。好心受佛戒者。莫作是破三寶之罪。若故作破法者。犯輕垢罪。

第四十八破法戒

若佛子。以好心出家。而爲名聞利養。於國王百官前說佛戒者。橫與比丘比丘尼菩薩戒弟子作繫縛事。如獄囚法。如兵奴之法。如師子身中蟲。自食師子肉。非餘外蟲。如是佛子。自破佛法。非外道天魔能破。若受佛戒者。

應護佛戒如念一子。如事父母。不可毀破。而菩薩聞外道惡人以惡言謗破佛戒之聲。如三百矛刺心。千刀萬杖打拍其身。等無有異。寧自入地獄。經於百劫。而不一聞惡人以惡言謗破佛戒之聲。而况自破佛戒。教人破法。因緣亦無孝順之心。若故作者。犯輕垢罪。

如是九戒。應當學。敬心奉持。

諸佛子。是四十八輕戒。汝等受持。過去諸菩薩已誦。未來諸菩薩當誦。現在諸菩薩今誦。諸佛子。聽。十重四十八輕戒。三世諸佛已誦。當誦。今誦。我今亦如是誦。汝等一切大衆。若國王。王子。百官。比丘。比丘尼。信男。信女。受持菩薩戒者。應受持。讀誦。解說。書寫。佛性。常住。戒卷。流通。三世。一切衆生。化化不絕。得見千佛。爲千佛授手。世世不墮惡道。八難。常生人道。天中。我今在此樹下。略開七佛法戒。汝等大衆。當一心學。波羅提木叉。歡喜奉行。

如無相天王品勸學中一一廣明三千學士時坐聽者聞佛自誦心心頂戴歡喜受持。

爾時釋迦牟尼佛說上蓮華臺藏世界盧舍那佛所說心地法門品中十無盡戒法品竟。千百億釋迦亦如是說。從摩醯首羅天王宮至此道樹下十住處說法品為一切菩薩不可說大衆受持讀誦解說其義亦如是。千百億世界蓮華藏世界微塵世界一切佛心藏地藏戒藏無量行願藏。因果佛性常住藏。如是一切佛說無量一切法藏。竟千百億世界中一切衆生受持歡喜奉行。若廣開心地相相如佛華光王七行品中說。

闕亦如是說四字

合註云微塵世界下

明人忍慧強 能持如是法 未成佛道間 安獲五種利

一者十方佛 愍念常守護 二者命終時 正見心歡喜

三者生生處 爲諸菩薩友 四者功德聚 戒度悉成就
五者今後世 性戒福慧滿 此是諸佛子 智者善思量
計我著相者 不能生是法 滅壽取證者 亦非下種處
欲長菩提苗 光明照世間 應當靜觀察 諸法眞實相
不生亦不滅 不常復不斷 不一亦不異 不來亦不去
如是一心中 方便勤莊嚴 菩薩所應作 應當次第學
於學於無學 勿生分別想 是名第一道 亦名摩訶衍
一切戲論惡 悉從是處滅 諸佛薩婆若 悉由是處出
是故諸佛子 宜發大勇猛 於諸佛淨戒 護持如明珠
過去諸菩薩 已於是中學 未來者當學 現在者今學
此是佛行處 聖主所稱歎 我已隨順說 福德無量聚

回以施衆生 共向一切智 願聞是法者 悉得成佛道
佛說梵網經卷下

藏本譌舛甚多茲依滿益大師合註本

上海圖書館藏書



A541 212 0010 1844B

上海佛學書局印行

普及本佛經

五四號	愚園路一	本局住址	壁也	版界之完	稱佛學出	對精確堪	過之又校	疎朗更將	刻而清晰	既無殊木	字體大小	鉛字印	概用三號	三十八種	現已先出	及本佛經	見印行普	者負捨	並減輕讀	佛法普及	本局為求
大乘莊嚴寶王經	無量清淨平等覺經	分別善惡報應經	阿彌陀經二譯	稱讚淨土佛攝受經	阿彌陀華經	妙法蓮華經	楞伽阿跋多羅寶經	維摩詰所說經	大佛頂首楞嚴經	觀無量壽佛經	無量壽佛經	金剛般若波羅蜜經	般若波羅蜜多心經	八大人覺經	遺教經	四十二章經	梵網經	十住論	圓覺經	了義經	名

一角二分	一角五分	五分	四分	四分	四分	四分	二角二分	一角二分	三角	四分	八分	四分	四分	四分	四分	四分	四分	一角	六角	六分	基本定價	
勸發菩提心	孟蘭盆經	四分比丘尼戒本	沙彌律儀要略	沙彌尼律儀要略	沙彌尼律儀要略	毗尼日用切要	六方廣佛華嚴經	寶梁經(大寶積經)	優婆塞戒經	觀彌勒菩薩下生經	彌勒下生經	觀彌勒上生兜率陀天經	七俱胝佛母所說陀羅尼經	藥師如來七佛本願經	藥師如來本願功德經	地藏菩薩本願功德經	名	名	名	名	名	名

一角	一角五分	一角二分	一角	一角	一角五分	七角	二元四角	一角	三角	三分	八分	八分	八分	八分	八分	一角	基本定價	基本定價	基本定價	基本定價	基本定價
----	------	------	----	----	------	----	------	----	----	----	----	----	----	----	----	----	------	------	------	------	------

517

中華書局

普通本

本館發行
 普通本
 內容豐富
 印刷精美
 適合各界
 人士閱讀
 歡迎訂閱
 詳情請洽
 本館發行
 處



中華民國三十三年十月重印

本館發行
 普通本
 內容豐富
 印刷精美
 適合各界
 人士閱讀
 歡迎訂閱
 詳情請洽
 本館發行
 處